

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD BANOVIĆI
Broj: 127 0 Pr 081852 24 Zm
Banovići, 15.12.2024. godine

Općinski sud u Banovićima, sudija Damir Dautović, uz učešće zapisničara Azre Mujić, rješavajući o zahtjevu Ministarstva unutrašnjih poslova TK, Policijska uprava Banovići, Policijska stanica Banovići, za izricanje zaštitne mjere V.M., broj: 08-06/13-2-INT 13/24 od 15.12.2024. godine, na osnovu člana člana 3. stav 2., člana 4., člana 19. i 23. stav 1. Zakona o zaštiti od nasilja u porodici („Službene novine F BiH”, broj: 20/13 i 75/21, u daljem tekstu ZZNP), dana 15.12.2024. godine, donio je

RJEŠENJE

Odbacuje se zahtjev Ministarstva unutrašnjih poslova TK, Policijska uprava Banovići, Policijska stanica Banovići, broj: 08-06/13-2-INT 13/24 od 15.12.2024. godine, za izricanje zaštitne mjere V.M., sin V., rođen ... godine, u T., nastanjen u B., ..., državljanin BiH, JMB ... i postupak **obustavlja**.

Obrazloženje

Ministarstva unutrašnjih poslova TK, Policijska uprava Banovići, Policijska stanica Banovići, podnijelo je Općinskom sudu u Banovićima zahtjev broj: 08-06/13-2-INT 13/24 godine, za izricanje zaštitne mjere V.M., zabrana približavanja žrtvi nasilja i zabrana uznemiravanja i uhođenja osobe izložene nasilju. U zahtjevu se navodi da je 14.12.2024. godine u 22,15 sati, R.M., iz naselja P., putem telefona prijavila dežurnom službeniku PS Banovići, V.M., sa kojim je bila u braku i sa kojim više ne živi, što je došao do njene porodične kuće, te bez njenog odobrenja ušao u unutrašnjost, te navodno istjerao njene goste i lupao flaše po unutrašnjosti kuće. Uz zahtjev dostavljeni su: Zapisnik o saslušanju svjedoka R.M., MUP TK, PU Banovići, Odjeljenje kriminalističke policije, broj: 08-06/13-1-298 /24, od 14.12.2024. godine, kopija Dnevnika događaja Policijske stanice Banovići sa prijavom pod rednim brojem: 2440 od 14.12.2024. godine i Službena zabilješka MUP TK, PU Banovići, broj: 08-06/13-2-04.3- /24 od 15.12.2024. godine.

Odredbama člana 7. stav 1. ZZNP, propisano je da nasilje u porodici postoji ukoliko postoje osnove sumnje da su učinjene radnje kojim član porodice nanosi fizičku, psihičku ili seksualnu bol ili patnju i/ili ekonomsku štetu, kao i prijetnje koje izazivaju strah od fizičkog, psihičkog ili seksualnog nasilja i/ili ekonomske štete kod drugog člana porodice.

Imajući u vidu opis djela, radnje koje se V.M. stavljaju na teret, po zaključku suda, ne predstavljaju radnje nasilja u porodici iz člana 7. stav 2. ZZNP ili prijetnju tim radnjama.

Iz navedenih razloga, primjenom odredbe člana 23. tačka 1) ZZNP, kojom je propisano da će sud odbaciti zahtjev za izricanje zaštitne mjere i obustaviti postupak kada se utvrdi da radnje koje su navedene u zahtjevu ne predstavljaju radnje utvrđene u članu 7. ovog Zakona, odlučeno je kao u izreci.

Zapisničar
Azra Mujić

Sudija
Damir Dautović

Pouka o pravnom lijeku: Protiv rješenja ovlaštenu organ može izjaviti žalbu Kantonalnom sudu u Tuzli, putem ovog suda, u roku od tri dana od dana prijema.